

Upozorenje sa naučne konferencije u Tuzli

Nezaposlenost je nacionalni neprijatelj

EU pozvana da BiH hitno "usisa" u svoje članstvo, kao što je to učinila sa Bugarskom i Rumunijom, i zabrani joj donošenje zakona koji urušavaju sistem i državu

Ekonomisti, statističari, privrednici i ini još ne mogu da se saglase oko toga kolika je stopa nezaposlenosti u Bosni i Hercegovini. Nisu to uspjeli ni na 3. ekonomskoj konferenciji Zapošljavanje kao generator razvoja, održanoj minule subote u Tuzli u organizaciji Sveučilišta/Univerziteta Vitez - Travnik. Na osnovu ovdje prezentiranih referata i diskusija kreće se između 24 i 82 posto?! Pravu cifru možda znaju političari, ali se oni na skupu nisu pojavili - čime su dali do znanja da za rješavanje ovog pitanja očito nisu zainteresovani.

Poruka političarima

Prema evidenciji Agencije za rad i zapošljavanje BiH, na isteku marta ove godine bilo je 530.055 nezaposlenih osoba, a iz izlaganja direktora Agencije Adnana Delića očito je da ih je iz mjeseca u mjesec sve više.

"Nezaposlenost je najveći problem države i porodice, a njegovo rješavanje pitanje nacionalne odbrane Bosne i Hercegovine", kazao je dr. Nikola Grabovac, rektor Sveučilišta i moderator konferencije. Pritom je ustvrdio da BiH nikad nije imala više novca za ubrzano zapošljavanje, ali on nije koncentrisan, nego leži u raznim kasama, bankama i na računima. Taj novac pristiže po osnovu primjene 1.476 zakona po kojima država (na svim nivoima organizovanja) ubire poreze i takse. Prof. dr. Mirsad Kikanović tvrdi da je to jedan od ključnih razloga što strani investitori ne investiraju kapital u BiH i otvaraju nova radna mjesta. Svojom retorikom i političari tjeraju investitore



Nikola Grabovac:
Novac leži u kasama

da se ne približavaju BiH, pa im je poručeno da u budućem dijalogu biraju riječi koje neće ići na štetu BiH i njenih građana.

Prema pozivu, konferencija je trebalo da ima tok kakav je uobičajen za ovu vrstu stručnih skupova: pozdrav organizatora, uvodna obraćanja, referati, diskusija, zaključci. Sve je palo u vodu jer se već na početku razvila debata i tražena pojašnjenja za mnoge izrečene ocjene, cifre i predložene mjere.

Hitne mjere

Zanimljiva stajališta o poboljšanju tržišta rada u funkciji zapošljavanja iznio je prof. dr. Kadrija Hodžić, dekan Ekonomskog fakulteta spomenutog travničkog sveučilišta. Da bi se ozbiljnije nosila sa visokom stopom nezaposlenosti, Bosna i Hercegovina bi u narednim godinama trebalo da ima stopu rasta od pet posto, a po svemu sudeći, tome se možemo nadati tek 2015. To znači da i u narednim godinama prijeti opadanje sandarda, porast nelikvi-



Mirsad Kikanović:
Političari tjeraju investitore

dnosti kompanija, smanjenje kreditnog rejtinga i povećanje potrošačkog pesimizma.

Brojne mjere za ubrzanje ekonomskog razvoja na kojima bi vlast trebalo da insistira, osim već spomenutih učesnika, predložili su dopredsjednik Privredne/Gospodarske komore FBiH Avdo Rapa, Ferhat Čejvanović sa grupom autora sa Sveučilišta iz Zagreba, prof. dr. Hasan Mahmutović... Insistira se na smanjenju poreza i usmjeravanju javne potrošnje na održavanje ukupne potrošnje i stvaranje novih radnih mjesta, zaokret u poljoprivrednoj proizvodnji i mjerama monetarne politike koje neće precjenjivati domaću valutu. Više novih radnih mjesta moglo bi se očekivati i pod uslovom da se smanji PDV. Mjere bi trebalo što prije donositi, jer će ukoliko Hrvatska i Srbija brzo uđu u EU, BiH izgubiti mogućnost da u te države plasi- ra oko 400 svojih proizvoda, što bi moglo ozbiljno poljuljati standard građana BiH.

H. ARIFAGIĆ